


## JONES, HUGH (1831 - 1883), gweinidog gyda'r Bedyddwyr a phrifathro coleg



**Enw:** Hugh Jones  
**Dyddiad geni:** 1831  
**Dyddiad marw:** 1883  
**Priod:** Catherine Jones (née Hughes)  
**Rhiant:** Jane Jones  
**Rhiant:** Hugh Jones  
**Rhyw:** Gwryw  
**Galwedigaeth:** gweinidog gyda'r Bedyddwyr a phrifathro coleg  
**Maes gweithgaredd:** Crefydd; Addysg  
**Awdur:** Margaret Beatrice Davies

Ganwyd 10 Gorffennaf 1831, yn Modedern, Môn, yn fab i Hugh a Jane Jones. Prentisiwyd ef yn grydd yn 14 oed gyda Lewis Prichard ym Modedern, symudodd oddi yno yn 17 oed i Lanfachraeth i weithio yn yr un alwedigaeth gyda John Roberts, Bedyddiwr o ran ei syniadau ac yn byw yn ymyl capel y Bedyddwyr. Derbyniodd Hugh Jones syniadau ei feistr; fe'i bedyddiwyd yn 1850, a dechreuodd bregethu yn 20 oed. Ym mis Tachwedd 1851 pregethodd ei bregeth gyhoeddus gyntaf. Yn ei awydd am ychwaneg o addysg cyn mynd ymlaen am y weinidogaeth aeth am ychydig amser i ysgol yn Llanrhyddlad ac oddi yno yn 1853 i athrofa Hwlfordd am 4 blynedd. Ei fwriad i gychwyn oedd mynd yn genhadwr, ond darbwyllywyd ef i roddi heibio'r syniad hwnnw, ac o ganlyniad derbyniodd alwad oddi wrth eglwys Gymraeg Llandudno, a chafodd ei ordeinio yn Awst 1857. Yn Rhagfyr 1858 priododd â Catherine, unig ferch John Hughes, Tŵr, Llangollen, a bu iddynt 13 o blant. Yn Hydref 1859 derbyniodd alwad eglwysi Llangollen a Glyndyfrdwy i gydweinigogaethu â'r **Dr. J. Prichard**. Dyma'r amser y bu'n olygydd *Y Greal*. Agorwyd athrofa'r Bedyddwyr yn Llangollen yn 1862 a phenodwyd Hugh Jones yn athro clasurol. Dilynodd y **Dr. Pritchard** fel prifathro'r coleg bum mlynedd yn ddiweddarach ar ei ymddiswyddiad. Yn 1877 cymhellwyd ef er lles i'w iechyd i fynd ar daith i'r cyfandir, a bu yn yr Yswistir a'r Eidal am 3 mis. Ymhlith ei gyhoeddiadau ceir *Y Beibl a'i Ddehongliad*, *Darlith ar y Bedydd Cristionogol* (1862), *Y Weithred o Fedyddio* (1863), *Eglwys Crist* (1876), a llu mawr o erthyglau a phregethau yn *Y Greal*, *Yr Athraw*, *Traethodydd*, *Seren Gomer*, *Baptist*, *Baptist Magazine*, &c. Ystyrir ef yn un o gewri'r enwad fel pregethwr, bugail, ac athro yn ei ddydd. Bu farw 28 Mai 1883, a chladdwyd ym mynwent y Fron, Llangollen.

### Awdur

Margaret Beatrice Davies

### Ffynonellau

H. Cernyw Williams : *Cofiant y Parch. Hugh Jones â€*; *Yn nghyda rhai o'i bregethau* (Llangollen 1884)

*Y Traethodydd*, 1884, 364

*Y Geninen*, 1883, 241

### Dolenni Ychwanegol

VIAF: 26215133

Wikidata: Q20821147

**Dyddiad cyhoeddi:** 1970

**Hawlfraint Erthygl:** <http://rightsstatements.org/page/InC/1.0/>



Arddull APA



Davies, M. B., (1970). JONES, HUGH (1831 - 1883), gweinidog gyda'r Bedyddwyr a phrifathro coleg. *Y Bywgraffiadur Cymreig*. Adferwyd 14 Tac 2024, o <https://bywgraffiadur.cymru/article/c3-JONE-HUG-1831>



Preifatrwydd a Chwcis  
Hawlfraint  
Y Prosiect  
Cymorth  
Cysylltu

LGC  
NLW

LLYFRGEL  
THE NATION



Model gan  
Llywodraeth Cymru  
Sponsored by  
Welsh Government